



TAPAK 10

Australian Open: Karolina Pliskova tsükogo

TAPAK 7

J&K-i mapang tetemsü nung state jenjang angutsü: Amit Shah



VOL. XVIII NO. 121 (ADOK 121) DIMAPUR

AMUNGNÜ (SUNDAY) TSÜKLAI (FEBRUARY) 14, 2021

₹ 5.00

COVID-19 Nagaland: Nisung 12,183 nungi 11,868 taneptsü nguogo

Kohima, February 13 (TYO): Honibarnü Nagaland nung nisung 7 dak COVID-19 aliba putet aser ano nisung 7 taneptsü angu.

"Tanü Kohima nung nisung 7 dak COVID-19 aliba putet. Maneni, Kohima nung nisung 7 taneptsü angu" ta Health & Family Welfare Minister, S Pangnyu Phom-i metetdaksü.

Tanü putetertem züngsema nisung ajak agi 12,183 kümogo aser iba nungi nisung 11,868 taneptsü nguogo, ta paisa ashi.

"Tanü tashi nung COVID-19 puteta alir nisung 88 asü saka parnok 10 bo tanga timtem ajanga asü. Külen, nisung 151 tashi tanga state temi ogo. Nagaland nung COVID-19 nungi taneptsü angubaji 97.41% lir" ta Health & Family Welfare Director, Dr Denis Hangsing-i metetdaksü.

District balala nung COVID-19 putetba: Dimapur (6,476), Kohima (3,867), Mon (605), Peren (507), Tuensang (248), Mokokchung (192), Zunheboto (142), Phek (47), Kiphire (41), Wokha (39) aser Longleng (19).

Nisung 12,183 nungi Traced Contacts 5,065, armed forces personnel 4,674, tanga state tem nungi arur 1,871 aser frontline workers 573 lir, ta paisa ashi.

District balala nung tang anepalurtem: Kohima (63) aser Dimapur (13).

Parnok rongnung nisung 2 dak shirangba yimya terara lir saka nisung 75 dakbo shirangba yimya kecha mali, ta Dr Hangsing-isa metetdaksü.

Taneptsü angurtem: Dimapur (6,329), Kohima (3,739), Mon (594), Peren (506), Tuensang (246), Mokokchung (183), Zunheboto (139), Phek (47),

Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemi bilemba sample 1,27,927 tendangogo. RT-PCR ajanga sample 74,369, TrueNat ajanga sample 37,239 aser RapidAntigen Test ajanga sample 16,319 tendang" ta Dr Hangsing-isa metetdaksü.

NISUNG 10,908 NEM

VACCINE AGÜTSÜOGO:

Nagaland nung COVID-19 vaccine agütsüba maparen inyaka arudar aser Hokolbar tashi nung nisung 10,908 nem vaccine agütsüogo.

"Nagaland nung health care providers 6,710 aser frontline workers 4,198 nem Covid vaccine agütsüogo. Tanü tashi nung vaccine agiba sülen nisung timtem ajuruba osang kecha mali" ta State Immunization Officer, Dr Ritu Thurr-i metetdaksü.

Deobar nungi tenzüka vaccine dose mezüng agiba healthcare workers atema tanabuba dose agütsütsü. Dose tanabuba agiba sülen COVID-19 vaccination certificate agütsütsü, ta Dr Thurr-isa ashi.

TEKÜLEM KIAJUNGA LAPOKTSÜ:

Külen, Nagaland sorkari tamangba yimsü dak sendakba tesemtem aser tekülem kitem talenba kecha melii lapoktsü melaogo.

"Tamangba yimsü dak sendakba tesemtem aser tekülem kitem ajunga lapoktsür, saka COVID inyakyim sülen anidaksüla aser mask o hand sanitizers amshitsüla" ta Principal Secretary (Home) Abhijit Sinha-i tanü metetdaksü.

Myanmar Army teyari agia NE nung telungpur khuret azüök

New Delhi, February 13 (Agencies): Northeast nung telungpur khuret azüökba nung Myanmar Army kanga junga yaritepogo, ta Chief of the Army Staff (COAS) Manoj Mukund Naravane-i metetdaksü.

Northeast nung internal security tensa tajungba kümogo aser rongsenkettsüng ainba, terenlok aser security sendaktepa lir, ta Naravane-i ashi.

"Mizoram, Tripura, Meghalaya aser Assam kübok tesem aika nung telungpur khuret samaogo" ta New Delhi nung shisatokden sentong ka nung pai ashi.

"Security forces-i tanen makai mapa inyakba aser ano sorkari policy tajungtem yangluba den ano Myanmar aser Bangladesh den tesentaktep

tajungba ayuba ajanga telungpur khuretem tera nung kongshiogo" ta Naravane-isa shisem.

Iba shisatokden sentong ya New Delhi United Services Institute-i Assam Rifles den yaritepa yashi ayongzüka agi.

"Myanmar Army den Operation Sunrise kübok mapa aika inyakogo aser sepaitem tsüngda amalitep takok ngua mapa inyaktetogo" ta Naravane-isa metetdaksü.

February 1, 2021 nü Myanmar nung mitkartemi Aung San Suu Kyi ket nungi sorkar tashi tashi atsünga agiba anema democracy pusemertemi lungkak aitba mapang ka nung COAS Manoj Mukund Naravane-i Myanmar Army nem tenüngsang agüja jembiogo.

Dy. CM Patton-i NH 29 yangluba semdang



February 13 nü Deputy Chief Minister, Y Patton aser National Highways Advisor, Dr. Longrineken nati anir ketdangsürtemi NH 29 nung mapa inyakba repringdanga senzüdang agiba noksa angur.

Dimapur, February 13 (TYO): February 13 nü Deputy Chief Minister, Y Patton aser National Highways Advisor, Dr. Longrineken nati NH 29 nung mapa inyakba repringdanga senzüogo.

NH 29 kübok Pakala Pahar tesem nung lung anenzüka aluba ajanga ntübertemi timtem kanga ajurur.

Dy. CM Patton-i NHIDCL nung Executive Director dang public lendongi maitüsü mapa inyaksü aser lenmang jungjunga yanglutsü tetuyuba agütsü.

Paisa ntübertem dang gari lenmang yangluba dak sendakba maparen angatetsü aser akokba

tashi yariteptsü mepishia metetdaksü.

Advisor Dr. Longrineken-ia NHIDCL aser department ketdangsürtem dang mapa jungjunga inyaksü metetdaksü.

Paisa NHIDCL ketdangsürtem dang mapang shitak nung iba mapa tembangtsü tetuyuba agütsü.

Y Patton-isa 7th mile Khopanal aser New Medziphema site ajanga by-pass road semdang.

NH 29 nung four lane yangluba mapang kilometer 18.5 talang by-pass road ajanga Dimapur nungi Kohima tsüngda senzütsü.

Chief Engineer (H) & Urban Engineering Wing, Er. Yanbemo Lotha-ia Department ketdangsürtem den ajurutepa jembidang iba lenmang yanglushiba maparen tenzüko aser tekaratiba nung tembangtsü ta ashi.

Tanü CAWD & NSDMA Advisor Kazheto Kinimi, Engineer-In-Chief (NPWD), Chief Engineer (NH), Chief Engineer (H) & Urban Engineering wing, Deputy Commissioner, Commissioner of Police, Dimapur aser department ketdangsürtemi Dy. CM Y Patton meina senzü.

BJP Nagaland khuret tuluba akümer

Kohima, February 13 (Agencies): Nagaland State BJP kübok BJP district unit tir 9-i party nungi anentsü ta amokmerenba ajanga mepetmesü ka adoka lir.

Nagaland State BJP tir Temjen Imna Along lenisüba kübok 2023 state elections nung BJP-i tamakok angutsü ta parnoki ashir.

BJP district tir nisung 9-i BJP National President JP Nadda dangi shidi ka züluba nung June 25, 2020 nü parnoki taoba National General Secretary, NE Incharge Ram Madhav den ajurutepa 'Submission of Memorandum for Replacement/ Change of BJP Nagaland State Unit President Temjen Imna Along' omen nung memorandum ka agütsüba shia lir.

July 19, 2020 nü parnoki National president den ajurutepa kasa onük lemsatop aser BJP Nagaland sasap nung khuret ajurua aliba atema mapa inyaksü mepishi ta BJP district tirtemisa shidi nung metetdaksüogo.

August 20, 2020 aser August 28, 2020 anogotem parnokisa Nadda dangi shiditem zülü. Maneni, October 12 nü parnoki National General Secretary Dilip Saikia dangi aser ano December 3, 2020 nü National Spokesperson & I/C Nagaland Nalin Kohli dangi BJP Nagaland sasap nung mepetmesü aliba atema shiditem zülüa liasü.

"State President aser par nisungtemi party nung ozüangi memelaba maparen inyaker. Parnoki tamakok anguba aser tim mesüi inyakbatem miimbangsü atema parnoki mapa inyaker. Iba inyakyim ajanga party tashimait kümogo aser state nung dang masü saka linük nung party tenüng menüksür" ta District 9 nungi tirtemisa BJP National President dang ashi.

Nagaland nung 'One Man, One Post' mapa küma inyaksüla. State President Along ya MLA aser Minister ka lir aser pai portfolio tongtipang aika bena lir anungji party Karyakartas nem mapang

magütsüteter, ta parnokisa shidi nung shia lir.

"Tang teinyakdak Tir kübok Nagaland State General Elections 2023 nung toktepra, assembly nung tang BJP MLA 12 aliba nungi 10 teküpok akümtsü" ta parnokisa metetdaksüogo.

November 3, 2020 by-election nung 60 Pungro A/C nungi party candidate-i tamakok tulu anguba ajanga onoki shiyonga aruba jangjatsüogo. Karyakartas ama onoki BJP party meraksadaksütsü mechi nung mapa nungi anentsü renema lir, ta parnokisa ashi.

"Nagaland nung BJP khuret tulu ajurua lir aser iba ya süoki ia bilemtsüla. Anungji February 2021 matemdangsa BJP Nagaland indang onük atema tiyongsüi aita mapa meinyakra, tang inyaka aliba menden toktsütsü saka tarutsü nunga party Karyakarta tajung kaka asütsü" ta BJP district unit tir 9-i National President JP Nadda dang ashi.

Kerala nung CAA mebenoktsü: CM Pinarayi Vijayan

Kochi, February 13 (Agencies): Kerala sorkari Citizenship Amendment Act (CAA) mapa küma meinyaksü ta Chief Minister Pinarayi Vijayan-i metetdaksüogo.

"Ozü sorkari state nung tia makaba tensa majurudaksütsü" ta Vijayan-i ashi.

Covid-19 vaccine agütsüba maparen tembangba sülen CAA indang mapa tenzüksü, ta Home Minister Amit Shah-i ashiba sülen anogo ishika lir Kerala Chief Minister-i iba osang metetdaksü.

"Asen linük nung home minister-i vaccine agütsüba maparen tembangba sülen CAA mapa tenzüksü ta tawa tu shiogo. Ozü sorkari state nung tensa meraksadaksütsü ta onoki jangjajangja shiogo. Onoki CAA magizüker aser mapa küma meinyaksü" ta tanü Vijayan-isa metetdaksü.

"Sorkar kati kodaser CAA mapa küma meinyaksü ta shiteter ta nisung kari onok dang asüngdang. Ni parnok dang,

onoki meinyaksü ta ashir süra, ibaji meinyaksü ta langzüogo" ta paisa shisem.

"Onoki terenlok onüktem olemteptsü, saka ibaji mesüi nisung kari kin o kin telemsa adokdaksür public ajungmesotsü meranger. Iba ajanga state nem tajangzük kecha bentsür marutsü. Kin o kin telemsa adokbaji state atema lendong lir aser asenoki ibaji samadaksütsüla" ta Vijayan-i RSS o Social Democratic Party of India (SDPI) teloktem aija jembi.

Assam Rifles-i NSCN (KN) züngsem ka apu



Dimapur, Tsüklai/February 13 (TYO): Police den senteper meita aoba mapang Assam Rifles-i, February 13 nü Dimapur kübok Nagarjan temeket nung NSCN (KN) züngsem ka puogo.

Osang tejangja angazükba sülen police den Assam Rifles

temi meita aoba sentong ka ayongzük aser NSCN (KN) züngsem ka apu. Pa ket nung 9mm Pistol Browning ka den magazine, 7.62mm AK-47 magazine ka, 9mm injang 11, point 38mm injang 14, 7.62mm (LMG) injang tenet, 7.62mm AK-47 injang 10 aser Spasma

Proxivom Capsules pongdang ti apu, koba sen lakh 30.72 shi asütsü.

Aija alisang den pa ket nungi apuba osettem ajak maneni ken o bushitsüngdangtsü atema East Police Station, Dimapur nem bendanga agütsüogo.

Peren nung Pre-Recruitment ayonga agi

Dimapur, Tsüklai/February 13 (TYO): IGAR (North) kübok Assam Rifles Jalukie Battalion-i, Heningkunglwa, Peren nung February 13 nü Pre-Recruitment Youth Meet ka ayongzüka agiogo.

Army nung adentsü jangrar lanur 21 iba sentong nung shilem

agia liasü. Rally mapang kuli kaket shidak renemtsü, temang anema alitsü aser army recruitment rally atema written tatidang dak sendakba nung onük balala benoka sensakasem.

Kasa mapang nung lanurtem temang tendangba den taruba

recruitment rally atema sample exam papers tem agütsü. Recruitment rally dak sendaka aliba tetendangba balala dak talisa rangloker tangazükba agüja liasü.

Lanurtemi Assam Rifles teyari asoshi kanga pelaba lemsatepa liasü.

Army Recruitment Rally ayonger

Kohima, Tsüklai/February 13 (TYO): Nagaland nungi lanurtem anioktsü atema March 10 nungi 20, 2021 nü tashi Bhagat Stadium, Rangapahar Military Stadium, Dimapur (Nagaland) nung Army Recruitment Rally ka agitsü.

Online ajanga tenüng züngoksemtüsü atema January 9 nungi February 22 tashi lapokja lir. Online registration atema www.joinindianarmy.nic.in-i login süang. Candidate shirnok taoba rally mapang shirnoksa züngokemogo, parnok indang indang login sütettsü mesera ano tasen züngoksemshitettsü. Tenüng züngkosemba aser

online application inyakyim tem ajak tembangba sülenang candidate tem rally nung shilem agidaktsütsü.

Mapa tazüng alibatem rongnung Soldier General Duty (10th & 12th standard), Soldier Technical (12th standard den Physics, Chemistry, Maths & English), Soldier Clerk (12th standard stream mashika den English aser Maths/Accounts/Book Keeping), Soldier Nursing Assistant (12th standard, Science den Physics, Chemistry, Biology & English mesera 12th standard, Science den Physics, Chemistry, Botany, Zoology & English), Soldier

Tradesmen (8th & 10th standard simple pass) densema lir.

CEE April 25 nü Rangapahar Military Station nung agitsü. Osang tejangjaba agitsü atema item phone number; 03862-249012/8974958673 ajanga mapa inyakba anogotem nung anepdang 8:00 ako nungi nikongtsütsü 2:00 ako tashi tongteprateptettsü. Tenüng züngoksemtüsü atema tatembangbuba anogoji February 22, 2021 asütsü, ta PRO (Def) Kohima Lt Col Sumit K Sharma-i sangdong ka ajanga metetdaksü.



Nagaland Rural Development Director, Imnükshila Jamir-i Honibarnü Impur Lenjem nung aluyimertem atema Farmers' Market ka lapoktsüadang tangokba noksa nung angur. Laisa ano Longjang yimda playground nung rostrum ka dena lapoktsü. (Mokokchung, February 13, 2021)

Assam CM-i producer 55 nem teyari agütsü

Guwahati, Tsüklai/February 13 (Agencies): Assam nung film industry nem teyari agütsütsü atema Chief Minister Sarbananda Sonowal-i, Honibarnü movie producer 55 nem senotsü teyari agütsüba den parnok mapa ajanga lokti ajangzüktsü asoshi inyaktüsü mepeshi.

Assam State Film Finance and Development Corporation (ASFFDC)-i, subsidy agütsütsü atema 2016 küm April ita 1 nungi 2020 küm March 31 nü tashi nung yangluba feature film 45, documentary trok aser movies tatsü pezü shima liasü

Chief minister-i, item movie producer nem mezüngbuba shilem nung aggregate subsidy ama sen crore kaka agütsüogo.

Pai, film producer, director aser artist tem dak lokti nung temelenshi bener arutsü aser state nung lanurtem purapitetba maparen balala nung shilem agitsü atema ajungmesotsü tashi lir, ta ashi. Nüburtem nem osang

agütsütsü asoshi film tem dak tashi lir ta shia Sonowal-i, film yanglurtem dang state nung aluyimba, industry aser alinük tebor ajung bushitsüngdanga itemji sayatsü ajungshi.

Paisa, science aser technology tsütsü Assam nungertemi takok anguba otsütem sayatsü mepeshi.

Kasa mapang nung Sonowal-isa, Assam nung mezüngbuba feature film Joymoti, 1935 küm Jyoti Prasad Agarwala-i yangluba bilemtetshia jembi. Pa ya state film industry tenzüker ka ama züngshir aser tetsükdaksü aika ajanger pai mezüngbuba film yanglu.

Paisa, Joymoti nung shilem agila aser Assamese cinema nung mezüngbuba actress Aideu Handique indang shisema liasü.

Dr Bhupen Hazarika indang ken ka indang jembiba mapang Sonowal-i state terenlok asoshi ajak longjemtsü nüngdaker ta ashi.

AR-i Lotha Academy nem tenla agütsü



Dimapur, Tsüklai/February 13 (TYO): Assam Rifles, Dimapur Battalion-i, Sovima, Dimapur nung Lotha Academy, Chumpo Museum nem February 12 nü Desktop Printer cum Photo copier machine ana agütsüogo.

Iba ajanga local lanurtem

nem parnok nükjidong tongtettsü atema teyari agütsütsü. Iba sempet ya Lotha Academy Secretary Nehumbemo Yanthoi-i agizük aser pai yimti nung aliba nüburtem tarutsü yanglutsü atema teyari tulu agütsüba atema Assam Rifles dang kanga pelaba lemsatep.

Meghalaya sorkar & taxi driver tem tsüngda mangatettep mebentet

Shillong, Tsüklai/February 13 (Agencies): Totzü jenjang ajungketba dak sendakba nung Meghalaya sorkar aser state nung taxi anshirtem tsüngda ano ken o mebenteti lir, aser telok ana sensaksem tangatettep ka dangi marui tembangba sülen taxi anishirtemi longkak aittsü asoshi sentong yanglu aliba ama agitsü mulungteter lir.

Meghalaya Deputy Chief Minister Prestone Tynsong-i Honibarnü, sorkari Meghalaya Joint Action Committee of Commercial Vehicles (MJACCV)-i mapang telatet ka makai longkak aittsü asoshi renemer aliba agintsü memulungra, taxi services tenzütsü atema jangrartem nem permit agütsütsü asoshi sorkari lenmang bushitsü, ta ashi.

"Sorkar ket nung lenmang aika lir. Joint committee-i longka aittsü sentong yanglur aliba maginra aser sorkar den teka

amteper minyakra, taxi service tenzükshtsü atema permit talila agütsütsü asoshi onoki lenmang bushitsü," ta Tynsong-i Honibarnü osangbenertem den sensaksemba mapang ashi.

Pai ashiba agi, MJACCV-i ken o bentettsü atema Mairang (West Khasi Hills) aser tanga tesem nung lokti senden ayonzüka agitsü telemtetba agiba ajanga kecha tajangzük mangutsü aser sorkari parnok takhangbatem jangja lir.

"Onoki parnok takhangbatem süoki ia asadangdar," ta pai ashiba den sorkari petrol aser diesel retail price, tax component nungi sen ana ajemtsütsü atema telemtetba agiatokogo, ta ashi.

"Petrol aser diesel jenjang lemtettsü atema saru, Finance aser dang department dak sendakba nung taruba hopta ano senden ka amentsü. Senden nung onoki telemtetba ka agitsü," ta Deputy Chief Minister-i ashi.



Honibarnü BPF MLA Charan Boro-i Assam Legislative Assembly nung jembidang NDFB telungpur karbo sorkar indang rehabilitation scheme kübok maden lir ta ashi. BTR Accord nung sign sütepba sülena NDFB züngsem kar anema ken o tem benoka lir aser NDFB tanishir Ranjan Daimari tang tashi tepuokdak yua lir ta Boro-isa metetdaksü.

Mukesh Ambani'er Jamnagar zoo-i black panther 2bener aoba aitsür

Guwahati, February 13 (Agencies): Assam State Zoo nungi black panthers 2 Gujarat kübok Jamnagar-i anir aoba atema Assam Congress-i aitsüogo.

Gujarat nung zoo ji Mukesh Ambani'er Reliance group ajanga lapokba lir. January ita Assam State Zoo-i black panther ananji Jamnagar nung private zoo-i yok.

Assam nung forest ketdangsür kati ashiba agi black panther ana melena Assam State Zoo nem zebra 2 agütsütsü.

Assam State Zoo-cum-Botanical Garden nungi black panther ana bener aoba ya Assam Pradesh Congress Committee (APCC)-i khukhua aitsüogo.

"Company tulutem ket nungi zoo nung puoka aliba arem shirurutema mejenbur ama lir. Guwahati nung aliba State Zoo nungi Gujarat nung Ambani'er Reliance group-i lapokba zoo-i black panther ana miima bener aoba ajanga ibaji sayur" ta APCC-i metetdaksü.

Yaküm Assam nungi Gujarat nung tekülem ki kati shidi asem bener aoba atema ola kanga adok. Ajisüaka Assam State Zoo nungi Reliance Industries-i lapokba zoo-i black panther ana bener aobabo kanga dang miimshia inyak" ta parnokisa ashi.

"Taküm January ita tanabuba hopta meta Assam nung animal lovers aser conservationists-i memetdaksüi dang black

panther anaji bener ao" ta APCC media department chairperson Bobbeeta Sharma-i ashi.

"Jamnagar centre den exchange program ajanga Assam nem Israel nungi bener aruba zebra ana agütsütsü ta tongti forest ketdangsür kati ashi, saka pai iba dak sendakba kulikaket agütsüba nung ibaji shia mali" ta Bobbeeta Sharma-isa ashi.

"Tawa Reliance Industries-i company aika atsünga agiogo aser PM Modi temoatsü ajanga parnoki telecom aser entertainment nungi retail marketing maparen ajak nung ajemoka lir. Tangbo parnok ket nungi arem shirurutem dena jenbua mali" ta APCC-isa metetdaksü.

Mizoram arogo tenteti Hailakandi nung atalokba aitsür

Aizawl, February 13 (Agencies): Assam kübok Hailakandi district nung mejangjatetba nisung kari tamangba yimsü ka amakba Mizoram Kohhran Hruaitute Committee (MKHC)-i aitsüogo.

Hokolbarnü MKHC senden ka amendang Hailakandi district kübok Gharmura nung Mongulbar aonung atalokba lendong osang metetpela liasü.

Iba lendong nung mejangjatetba nisung kari Presbyterian mission school (mission compound) amak aser school headmaster den par kibong dak teka sangshi.

"Headmaster, H. Vanlaldika aser par kibong dak teka aiba aser kanga mejungi yirutsüba osang angashia temolung raksar aser iba inyakyim khukhua aitsür. Loktiliba nung mepetmesü adokdang aser ozüing alema mapa inyakdang tamangba yimsü dak sendakba tesemtem nung jenoker" ta parnoki sangdong ka nung metetdaksü.

Bangdak ketdangsürtemi aibelenertem aputsüla aser ozüing tapet agi merenshitsüla ta MKHC-i takhangba agütsü.

Parnokisa Mizoram-Assam arrtsülen tensa süngjema akümtsü atema

sarasademsüba metetdaksü aser iba tesem nung alirtemi ozüing alema mapa meinyaktsü ayongzük.

Zophai mesüra Kachurthal nung arrtsü mangatetep dak sendakba nung mejangjatetba nisung kari Mongulbar aonung Gharmura nung Presbyterian school amak.

Parnoki school nung mi senoktsü, osetsüsettem raksatsü aser school headmaster'er kibong dak teka sangshi.

Iba mapang school headmaster H. Vanlaldika, pa kinungtsü aser tanur asem yiru aser parnok Aizawl nung mozü ki ka nung anepaludar.



Honibarnü Happy Valley, Shillong nung aliba 58 Gorkha Training Centre nung Indian Army recruits 248-i passing-out parade agidang tangokba noksa angur. (Shillong, February 13)

Majuli nung tesayur ka mapa nungi anentsü

Jorhat, February 13 (Agencies): Majuli nung primary school tesayur ka tim mesüi mapa nung aniokba atema Inspector of schools Subhalaksmi Rajkumari-i anentsüogo.

Tapan Medhi ya Natun Chapori LP School nung assistant teacher ka lir aser pai tebu Deba Kanta Medhi mapa teinyakdak nung süogo ta tiyazü shia mapa nung aniokdaksü. Tapan Medhi tebujia school tesayur ka liasü.

Elementary education nung director dang nungi temelaba anguba sülen pa mapa nungi anentsüogo aser pa anema departmental bushisüngdang ka tenzükogo.

Rajkumari ya Jorhat district

elementary education officer lir aser Medhi anema ken o ka benokba sülen lai bushisüngdang asütsü tetuyuba agütsü.

"Medhi-i tebuji May 11, 2009 nü service period NUNG asü ta kuli agütsü, saka bushisüngdanga aodang tebuji December 31, 2009 nü küm 35 ser ita pezü ser anogo 30 mapa inyakba sülen sodi anguba kuli liasü" ta Rajkumari-i ashi.

"Pai state sorkar nungi superannuation tajangzük ajak ngua liasü" ta laisa shisem.

2012 küm Tapan Medhi-i compassionate ground nung Rajabari LP School nung tesayur inyaktsü mapa angu. Pa mezüing Jorhat kübok East Block nung mapa lemozük aser idak nung jagi Majuli-i transfer asü.



Honibar nikongdang Jorhat kübok Jankhona yimtsüing nung kitsükkirong lendong ka atalokdang nisung ana yiru aser ki asem rongdok. Iba lendong nung Nanda Das, Ramen Das aser Pankaj Das nunger ki mitsü küma rongdok. (Jorhat, February 13)

Manipur Police-i KNLA ket nungi nisung 3 kümzük

Imphal, February 13 (Agencies): Hokolbarnü Manipur Police-i Imphal East district nung telungpurtemi pur aoba nisung asem kümzükogo.

February 7, 2021 nü Kuki National Liberation Army (KNLA) züngsemtem ta temolung melemer bilemer kari mapa inyakertemji pur ao.

Police-i nisungpurtem den ghonda ana shi khatepba sülen Boljang aser New Boljang yimtsüngtem anasa nungi par asem kümzük.

Iba mapang AK-56 assault rifle ka angu, ta police-i ashi.

Mapa inyaker asemji Yumnam Sushilkumar, Nanao (30), Laishram Debchandra

Singh (50) aser Ngangbam Gunadhar (55) nungertem ta jangjaogo.

Parnok ya Nongpok Keithelmanbi anasa Laikhong nung PMGSY scheme kübok apu yangluba nung shilem agia liasü.

Parnok pur aoba ken o ka Thoubal Dam Police Station nung benokba sülen police commando temi par asem kümzüktsü atema mapa inyaktsü tenzük.

Telungpur ket nungi nisung asem kümzükba atema Manipur chief minister N Biren Singh-i Imphal East Police nem Rs 10 lakh senpet agütsüogo.

Mizoram nung railway station kobi melii lapoktsü

Aizawl, February 13 (Agencies): Centre-i year 2021-22 Budget nung Bairabi-Sairang project atema Rs 1, 000 crore lemozüktsüogo aser iba ajanga Mizoram nung kobi melii railway station ka lapoktsü.

Bairabi-Sairang railway line project ya March 2023 tashi nung tembangtsü ta osang angazüker.

"Train lenmang agi

sendaktepba ajanga Mizoram nung alirtem dang masü saka North East tesem ajunga ajangzüktsü" ta NFR-i metetdaksüogo.

Mizoram nung shishilembartemi khu jenjang dalangba nung bener arutettsü. State nung aluyimertemia state balala dangi jenjang dalangba nung aonsotsü bener yoktettsü" ta NFR-isa ashi.



TIR YIMYIM YIMOBILEM (EDITORIAL)

DIMAPUR AMUNGNÜ, TSÜKLAI (FEBRUARY) 14, 2021

DEOBAR SCHOOL-IAOTSÜ AJUNGME SODI

Asenoki tanurtem tila asü dang Yisu Khrista sülen anidaktsü mesayura, alimai parnok dang Yisu sülen manidaktsü sayutsü. Anungji tsüraburtemi tila tanurtem Tsüngrem o nung anitettsüba kanga tongtipang, yamaji meinyakra pa/la taküm amajok nung dang lir tembangtsü. Tsüngremi tila tanurtem tim lenmang nung anitetdaksünür aser ibaji tsürabur indang tebilemtsü khuret lir. Apijemtsü Shin 22:6 nung "Tanur ka pa aotsüba lenmang nungji sayutetang; Aser pa tain akümdang iba nung jagi mepilatsü" ta shia alibaji tsüraburtem nem nungloktsüba mapa ka lir. Ajisüaka, asenoki asen chirnurtem dang Khristan ka ama libalirotsü tesayuba mesayudang tamasa asenoki asen taküm nung Khrista anioktsüla aser tanurtemi aseni inyakba, jembiba ajak nung Khrista angutsüsa alitsü asoshi merangtsüla. Laishiba nung Tsüngremji temeshi lir aser asenoka temeshi alitsü atema ayongzüker saka asenoki yamaji mekümtettsü. Asenoki Yisu Khrista ama melitetsü mesüra Pa ama tashishitsü maketba aser tetemjen nisung amabo mekümtettsü, saka asenoki Khristan tamanger tajung ka amabo litettsü akok. Kodang tsüraburtemi Khristan tajung ka ka ama lia sayudir, tanurtemia iba jiluji melamela ajizüktsü aser asenoki parnok nem tesayuba agütsüba jiparnoki menungnangi dang mulungsoa agizüka benshitsü. Maneni asenoki mezüng Tsüngrem den tesentaktep ayutsüla, tanabuba nung kibong atema tongti süa bilemtsüla aser tasembuba nungang mapaji südaktsütsüla. Kodang asenoki asen kibongji kanga tongtipang ta angatetdir, asenoki chirnur nem mapang peria agütsütettsü aser iba jagi parnok den tesentaktep akangakanga ayutsü. Asenoki tanurtem nem Laishiba angazükdaktsütsüla aser Tsüngrem o sayutsüla. Hao, arogoi tila tanurtem atema Deobar school lapokja lir aser iba nung parnok dang Tsüngrem o sayur saka Tsüngrem o angazüktsü atema terajibo kibong nungi tenzüktsüla. Tsürabur aser tanurtemi arogo den tesentaktep ayutsüla kechiyong Khristantem tsüngda tesentaktep alitsüba kanga tongtipang. Asenoki asen chirnurtem dang Tsüngrem külemtsü sayutsüla aser ibaji sentepsenji nung adenba ajanga mapa küma sayur. Tamangertem ajak atema sarasadem ya kanga tongtipang aser asenoki sarasademba nung mapang endoktsüla. Anogoshia sarasadem mapang aliba ajanga tanurtem tim lenmang nung anitettsü aser parnok Tsüngrem dak tali amangtsü tangatetba akangshitsü. Asenoki asen tanurtem den külemi sarasadem mesüra aser parnok atema mesarasademtsüra, parnok tamang ainba nung tetsükdaktsü ajurutsü. Yaküm asen lima nunga coronavirus wara agi kongshiba ajanga Tsüngrem külemtsü asoshi tenla kidang madenshitettsüsa tensa ka ajurua liasü. Iba wara ajanga arogo aika nung sentep dak sendakba maparen kecha meinyaktet aser iba nung tanurtem asoshi Deobar School dena liasü. Ajisüaka, tanü tensa tajungba akümba ajanga tenla kitem lapoka tekülem sentep agidar aser talisa, tan ita nungi Aoli Arogo aika nung Deobar School tenzuka agidar. Anungji pei tanurtem asoshi tebilemtsü khuret abenba tsüraburtemi pei chirnurtem Deobar School-i aotsü atema ajungmesoa parnok tamang aser tanüla jenjang akangshidaktsüdi.

OLEMSABANG

MOPUNG PUTU DEN APET AROGO TENYABA MAPA

~ Dr. Tinumeren Ozüküm

Tanü internet tashi ajanga alima inyakyimbalaka kümogo. Internet renlokba ajanga meimchir mopung putui ayaokogo. Iba mopung putu nung internet tashi medeni lokti aser arogo tejakleni moutettsüba putu ka lir. Talisa, lokti tongtepratep (social media - Blogs, Facebook, Twitter, YouTube, WhatsApp, Myspace, Instagram) tashi ajanga tangtetba, libaliro aser yimya-koya balaka melenshiogo. Aser iba mopung putu tasenba nung meimchir ajak dak kasa "tashi" (power)kar, aser iba tasenba mopung putu nung meimchir ajaki terabo alima osang asüyonga, yimden yimli aser tamangba balala indang osangtem meteter. Joko akhi putu ama takar, tashir aser oshirtemi ashiba ajakshitak ta agizükbatoto masü, saka asen tendak meimchir ajak ola angashitsüsa internet-i bener arutsüogo, aser iba nungjaginüburtemi leman balala ajanga ochiba bushitsü meranger aser angazüker. Yongji tanü putu dang "mopung putu" (postmodern age)ta ajarkechiaser akhi inyakyim aser sayuyim indoker, takar, tashir aser oshirtem ashiba kisüng to dang masü, saka leman balala ajanga ochi bushia lokti aser arogo yangerba putu ka. Tongmelang agi, tanü mopung putu tensa nungbo ni/nai ashiba aser metetba kisüng shitakta masü, saka leman aisü nungi ochi bushitsü meranger aser angazüker.

Mopung putu nung kanga tongtibang kaji lokti aser arogo "structuralism system" (akhi yayim tazüokba) nungi adoktsüla, kechiba süra akhi yayim tazüokba yimya nung dang mopung putu nunga inyaka odi asü nungbo temelenshi bener marutettsü aser aji tamakoktsü. Tejen yayim (structure) nung dang lokti aser arogo maparen balala ajak bener aotsü merang nungbo teraksa aika bener arutsütsü. Ano akhi yayim tazüokbanungji shisatsü aser mapa tasen magizükteter. Tangari ashibatam magizükteter asü anungji lokti aser arogo tangatetba tasen nung sadema aotsü makoker. Peter Barry-i ashir, "Structuralised are interested in structural law that deal with coexistence rather than changes." Anungji tanü putu lokti aser arogo nung teinyaktsü tongtibang kaji akhi yayim tazüokbanungi adoker mopung putu tasen yayim tangatetba nung arogo aser lokti koda anir aotsü ta asüba kanga tongtibang. Iba tangatetba nungjitanü lenirtemi metettsüba o-long asem dang zülur.

1. Tashi vs Khuret

"Tashi" ta kodang südir, taoba putu nung aiben tashiyim, ozüng agüja aniba ta tangatet. Ibala lenisüba jiparnok mopung putu nung mapet. Tashiyim amshia arogo aser lokti anira telemsa aser mangatettep, rongrong aser tetsükchitep dang adokdaktsü. Tashi ya meimchir ajak nem Tsüngremi agütsü, aser ibaji shingaia rakzüktsü makok. Tashi, tekolok aser tajung-majung radanga metetba shisatsü aliba ajanga meimchirji Tsüngrem mesükba nung yanglu ta ashir. Anungji meimchir shia dak akaba tashiji arogo aser lokti nung leniri, kija shia dak alibaji tashiji, sempetji ajiteta aser angateta amshitsü kanga tongtibang.

Ano tanü putu nung, nüburtemi lenir shibai khuret benteter iba lenirji aginer. Anungji arogo aser lokti nung khuret bentetba lenir shimtsüla. Yamaji leniria nüburtemi taginüba aser tejangraba kechi aji nendaka, aroka bushir külen, iba yimya nung nüburtem tsüratema anir aotsü merangtsüla. Lenir ka dak khuret bentetba aser taküm bendanga agütsüba yimya alitsüba jiparnok Laishiba jangja jangja sayur. "Nenoki kechisa inyakdir aji nisung dang masü, saka Kibuba dang temulung ajak agi inyakang kechiyong nenoki Kibuba Khristaji tenzüker." (Kolosi 3:24). Anungji khuret abenba lenir jiki Yisu Khrista yimya nung nübur tenzüktsüla. Kodang arogo aser yimden nung tashiyim amshidir, Yisu-i sayuba lenisüba yimya nung kodanga inyaktsü makoktsü. Kechiba süra tashiyim amshiba nung ibai dang shitakba ta bilemba yimya arur. Arogo aser lokti nung tashiyim amshiba yimya ya rongsen dak dang rangloker inyakba (capitalism) yayim nungi adok. Iba lenisüba anungji nisung ka kübok, nübur ajak pa tashi kübok dang züp ta amokbanger anir aotsü merangtsü (one man show leadership). Kija lenir ka tashi nung nübur ajak arakmoka yudi ta asüba lenisüba nung kodanga lokti tejakleni maotsü. Iba den arogo aser lokti nung tulu aser tila, takar aser sensaker ta bendanga amshitsü aser nübur rongnung, arogo aser lokti nung telemsa adoktsü. Anungji khuret mebantetba, saka tashiyimbo amshiner ta asüba lenisüba nung tamakok teti alitsü. Tanü putu nung lenir ka khuretji kija shia dak koba tashi aser sempet lir ibaji achiteta parnok nem khuret agütsütsüba kanga tongtibang. Yamaji inyak nung dang arogo aser lokti tejakleni otet.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Myanmar nung yimsü balala nungi ajaki sepai anema longkak aiter



February 8, 2021 nü Yangon nung Buddhist monk temi State Counsellor, Aung San Suu Kyi den linük lenirtem chiokang, ta takhangba agüja longkak aitba noksa nung angur.

February 13, 2021: Tawa Myanmar nung sepaitemi State Counsellor, Aung San Suu Kyi den lenirtem aika apuba sülen linük nung emergency sangdongba anema tamangba yimsü balala nungi nüburtemi yimti-yimdong nung adenshir longkak aitar.

Tamangba yimsü balala nungi süaka Myanmar nung Buddhist nungertem, Khristantem, Muslim nunger aser Hindu nungertemi sepaitemi tashiyim amshiba anema longkak aitba den külemi linük lenirtem chiokang ta takhangba agütsür.

Tawa Cardinal Charles Bo-i Arogotem dang, longkak aitba mapang nung Catholic Khristan indang wako aser temaitsütem mamshitsüla, ta tuyua liasü ajisüaka putirtem, nun tem aser

Khristantemi Mandalay, Pathein aser Myitkyina nung ozülü balala amer longkak aiter. Yangon yimti nungi kilometer 80 shi pilar aliba Buddhist monastery, Pegu nungi Buddhist nunger putir 8-i February 11 nü yimjak nung shidi ka ajanga nüburtem dang temenen lenmang meshimtsüla, kechiyong iba jagi linük tammangleni anitsü aser raksatsütsü, ta metetdakja liasü.

National network of church planters lenir, Michael Koko Maung-i, "Onok tamangertemi (Khristantem) maneni tesünep nung longkak aittsü, insang tema longkak aittsü, yimdong süa jajaa longkak aittsü aser sepaitem aija yimyim ayimtsü. Alima dang onoki iba anema rarar ta onoki metetdaksütsü," ta ashi.

Wara liaka yaküm Wycliffe Associates-i Laishiba oshi aika nung meyipogo

February 13, 2021: Alima nung oshi balala nung Laishiba meyipzükba International organization-Wycliffe Associates-i 2020 küm Laishiba oshi aika nung meyipzüka adokogo; parnoki 2020 küm nungsa Laishiba oshi timba nung meyipzük.

Wycliffe Associates interim president aser CEO, Tuim Neu-i, coronavirus wara liaka National Bible translators kari Laishiba meyipzükba mapa tulu inyakogo, ta metetdaksü.

"Timtem aliba tesemtem nung, reshikangshi aser lendong aliba tesemtem nung tamangertemi iba maparen (Laishiba meyipba) atema kanga nendaka inyakba ngua ni kanga pelar," ta pai sangdong ka ajanga metetdaksü.

Wycliffe Associates-i oshi ajak nung Laishiba meyipzüksü nükjidong nung 1967 küm nungi tenzüka Laishiba meyiper.

2020 küm nunga parnoki oshi 8 nung Tejen Lai meyipzükmaogo aser tasen Lai bo oshi 141 nung meyipzükogo.

Tang Wycliffe Associates-i oshi 773 nung Laishiba temeyipdak lir aser 2021 küm oshi 273 nung Laishiba meyipzükjang ta parnok nem temepishiba agüja lir.

Oshi ka nung Laishiba ajak meyipzükba nung US nunger sen 19,500 adoker. Coronavirus wara aliba nung ajemdaker Wycliffe Associates-i technology tasen amshia Laishiba meyipba maparen tekaraba nung inyaker; item rongnung video calls ajanga oshi meyipzükertem nem shilem agidaktsüba densema lir.

"COVID wara anema linüktem shibangba ajanga Laishiba meyipzükertemi pei kidang nungi dang mapa inyak. Iba denji külemi online Bible translation system ajanga nisung aikati mapa methitemi inyaker," ta Neu-

Myanmar sepaitemi lenirtem apuba sülen küm 1 yimsüsütsü sangdongba sülen tang linük tesem ajungalen nüburtemi longkak aitar, ajisüaka sepaitemi nüburtem ola nembangtsütsü meranga longkak aitertem dak tzü khaloktsür aser injang amshir.

Longkak aitertem aputsü atema jail azüngtetsü asoshi sepaitemi jail nung puoka alir 23,000 dak tema chiokogo.

Aung San Suu Kyi chiokdaksütsü aser linük nung democracy inyakyim shidak beshidaksütsü atema US aser UK nati Myanmar sepai lenirtem anema inyaksü tebilemba lir.

United Nations Human Rights Council-ia Myanmar nung lenirtem chiokang ta takhangba agüja bangzüng ka renemogo.

i metetdaksü.

Yaküm Wycliffe Associates-i nükpokertem aser narong-jakertem atema Tasen Lai meyipzükmaa liasü; ibaji ajanga nükpoker aser narong-jaker million 56-i Lai O metettsü.

Oshi meyipzükba ya notation lir, koba dang SUN (Symbolic Universal Notation) ta ajar, kechiyong ibaji ajanga Laishiba nung aliba olongtem temaitsü sayur.

"Onoki Tasen Lai tekong aser tapu shia nungi tongtibang onüktem agiteter. Item onük shia atema onoki temaitsü kaka yanglu," ta SUN Program Director, Lori Jenkins-i metetdaksü.

Wycliffe Associates-i ashiba agi, SUN ya shisaliok agütsütsü atema lir, kechiyong alima nung nisung million 70 shi tenarong jaker asor aser iba nungjagi shilem 80-i 'sign language' ajanga mejembiteter," ta Jenkins-isa metetdaksü.

ANOGO ABEN TSÜNGREM DEN

Temeim mapa kodang tessama masü
1 Yohan 3: 11-18

Nisung dang masü Kibuba dang tenzüker ama temulung ajunga agi tenzükan. Efesa 6:7

Tsüngsem yanglur kati ashi, "Kü mapaji tanelatem kümzüksüba, saka teintokbaji aatsü asoshi ni tsüngsem ateper." Pa mapaji asangtsü tetemsü, tamang katetba Khrista ka ama pai par kiyonger tsüngsemjia tajungtiba süa ateptsütsüla. Tanela anir aruba aser tsüngsem atepshiba nung tsüngsem yangluri kiyonger dang temeim sayu aser Tsüngremi yangluba apen süoshi aser tsüngsem agütsüba agi Tsüngrem yari. Yisu asoshi asen kiyonger dang meimtsü aser tenzüksü asoshi asenok aja. Asenok temeyoktep telok nung parnok nüngdak tepenja lir. Asen ajak talidak ki, chiyongtsü, apen-süoshi, shishilembadak, leman, meti, tezüng, mozü aser aika nüngdak lir. Mapa shiai meimchir junga alitsüba nung yarir. Asen mapa ajanga asenok asen kiyonger, shirnok Tsüngremi yanglu aser alangzük, parnok yarir.

Kodang asenoki asen kiyonger adianu ama reprangdir, iba jagi tangar dang nungi balaka kümdaktsür. Asenoki meimer kechiaser asenok Tsüngrem dangi anir arutsü asoshi Khristai asenok dang tama meim. Iba temeim sayutsü leman kaji asen mapa ajanga anogoshia asen kiyonger nüngdak nung yaribaji lir. Iba temeim mapa kodang tesama masü.

O Yisu, Nai mapa jenjang angatet. Ibai temeim nung Na aser onok kiyonger atema inyakdakjang. Amen.

Malaysia nunger Pastor Raymond
Koh samar küm pezü jungogo

February 13, 2021: Malaysia nunger pastor ka puer aoba sülen joko küm pezü jungogo, ajisüaka pa süadoker asü kong aliar tang tashi mejangjar, ta International Christian Concern (ICC) osang ajanga metetdaksü.


2017 küm February 13 nü Petaling nung tebur telok kati Pastor Raymond Koh puer ao.

Nisung aikati pa samaba atema sorkar dak melung malemer. Human Rights Commission of Malaysia (SUHAKAM)-i mapang talangka iba tatalokba bushisüngdanga aruba sülen 2019 küm April ita nung SUHAKAM-i, Malaysia sorkar agents-i Pastor Koh samaba ama sayutsü meranger, ta metetdakja liasü.

Ajisüaka Malaysia sorkaribo, Malaysia Police intelligence unit Special Branch-i pa apu, ta metetdakja liasü. Iba sülen taoba mapang Inspector-General of Police, Abdul Hamid Bador-i SUHAKAM-i police tenüng menüksür, ta aija liasü.

February 6, 2021 nü Christian Federation of Malaysia Chairman, Julian Leow Beng Kim-i Malaysia nung aliba Arogo ajak dang pastor Raymond Koh samar küm 4 ajungba nüngtem nung taruba hopta ana tashi pastor atema sarasademjang, ta mepishia metetdaksü.

Pastor Raymond kinüngtsü, Susanna Liew-ia iba osang jungkai adoktsü atema campaign ka tenzükogo. Laisa Malaysia nunger dang Koh den tangar asem samaba atema 'tangatetba pezü' inyaksü



mepishia metetdaksü.

Lai Malaysia nunger dang tangatetba pezü inyaksü mepishiba rongnung- parnok samaba shisadangtsü, samaba nisungtem bilemtettsü, kati ka nungittsü aser Koh den tangartem chioktsü densema lir.

Raymond Koh (1954-1955) ya Khristan pastor ka lir. 2017 küm February 13 nü Petaling Jaya nung pa par medemer ki kati aoba mapang nung tebur telok kati pa puer ao. Iba tatalokbaji CCTV ajanga tangoka liasü. Gari tanak asem nung tebur 15 shi arur pa puer oa liasü.

Koh samaba sülen lenla aika nungi shisadanga bushisüngdangdar: Malaysia nung Islamic ozüngtem tesashiba benoktsü merangba mapang ka nung Koh apu. Pai Muslim nunger nem Khristan yimsü agizükdaksütsü meranger, ta pa nem tai tonglokja 2011 küm mangatettep tuluka adoka liasü.

Tamalen Malay oshi nung shidi ka ajanga pa taküm amokmerena liasü; shidi denji külemi injang ana seper pa nem agüja liasü.

OLONG PAITEP # 5724

[illegible]

<u>TIPILEN</u>		<u>LANGTSÜNGLEN</u>	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

OLONG PAITEP # 5723 TELANGZÜBA

TIPILEN : 2. Anükalem, 4. Mesak, 5. Apet, 9. Meimtep, 11. Posü, 12. Patak, 13. Tekettsü.	LANGTSÜNGLEN : 1. Kündang, 2. Ayak, 3. Leptep, 6. Sati, 7. Yiar, 8. Sangküm, 9. Metsük, 10. Mazü.
---	--

KOMA SÜLA TELANGZÜBA

**Q. Arogo nem Tsüngremer mapa inyaktsü asoshi pei
ajangzüktetba rongsen nungi 10% tenla agütsüba ama
government nema terenlok mapa inyaktsü atema 5%
agütsü nunga koma süla ?**

Arogo nemTsüngremer mapa inyaksü asoshi pei ajangzüktetba rongsen nungi 10 % tenla agütsüba ama government nema terenlok mapa inyaksü atemaji ochishia mapaji work order nung aliba spacification ama junga inyakra 5% tang masü estimate nung enoka aliba ama 10% a agütsüla. Saka inyakdang spot nung engineer mesüra mapa meteter repanger alitsüla.

- SMS

Shirong nem shekang tajung ana azüksü ama süla aser iba shikang raktepdang yimsüsüba menden loktsatsü ana nung lir. Anungji kecha mebulushili.

-SMS

Ter nungi ka Tsüngrem nem agütsütsü yabo Tsüngremi asenok dang nungi akhanger aser aji Tsüngrem meyong. Ya asen meyong masü saka Government nem pungu shilem agütsütsüba yabo tim masü. Govt-i nüburtem atema lenmang yanglutsü sen yokba ama project tasen tapu balala tenzüka inyaksü aser timtemer makamaiter nem teyari agütsütsü atema arur, saka ajia tulurtemi ochimeshii agizüka agiadoker. Anunngi asenok anguba nungi govt nem pungu shilem agütsütsüji tim masü. Service wala asüyonga, aayanga dang alir asüyonga govt nem pungu shilemji magütsüba tajunga asüsütsü ta kü tebilemba shidanger.

-T.Ao MKG

TANÜBO NAI LANGZÜANG

Q. Safer Internet Day ya _____ kûm tenzûk.

A. 2004 B. 2002 C. 2001 D. 2000

===== (Taruba adok nung onoki langzüsü)

YASHI ADOK TELANGZÜBA : 2016

Tanur asoba anogo nung salem osang den noksa angati adokdaktusunura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela
Tasoba Anogo



1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA?

ALIMA NUNG NÜNGTUGU SPORTS BRAND KAR: FEBRUARY 2021

- ## FEBRUARY 2021
1. Nike
 - Worldwide sportswear sales: \$39.1 billion
 - Main sports product: Shoes
 - Founded in: 1964
 - Based in: Beaverton, Oregon, USA
 - Owned by: Nike, Inc.
 2. Adidas
 - Worldwide sportswear sales: \$25.6 billion
 - Main sports product: Shoes
 - Founded in: 1949
 - Based in: Herzogenaurach, Bavaria, Germany
 - Owned by: Adidas AG
 3. Puma
 - Worldwide sportswear sales: \$5.7 billion
 - Main sports product: Shoes
 - Founded in: 1948
 - Based in: Herzogenaurach, Bavaria, Germany
 - Owned by: Puma SE
 4. Under Armour
 - Worldwide sportswear sales: \$5.2 billion
 - Main sports product: Shoes
 - Founded in: 1996
 - Based in: Baltimore, Maryland, USA
 - Owned by: Under Armour, Inc.

(Maneni asüng adok nung...)

SUDOKU # 5766


8	3	4	7	2	5	1	9	6		3	5			6	2	9	1
5	6	7	3	1	9	8	4	2			4			2		5	8
1	9	2	4	6	8	7	5	3	2	6		1	5				7
9	2	6	1	3	7	5	8	4						4	3		5
4	1	3	8	5	6	2	7	9	7							4	2
7	8	5	2	9	4	3	6	1			8	5	3	7			9
6	4	1	5	7	2	9	3	8	5		2	6	8			1	
3	5	8	9	4	1	6	2	7				7	4				
2	7	9	6	8	3	4	1	5	3	4			1	5	9	8	6


TELANGZUBA # 5765

OJANG LUTEP # 5312


JATEK : 


TSPRANTEREGÜ : 


TAGJJUNI : 


JIKA : 


ÜKSNHIR : 

AKSA : 

ISATSHSÜ : 

NGJITAJUBO : 

AKAJI : 

IMEMER : 

OJANG LUTEP TELANGZÜBA # 5311

**NÜBENER KIBONG NUNG TSÜRABUR DEN SAKO
KÜMER TEDI TENU TENZÜK**

TAN HOPTA ATEMA - KOMA SÜLA ?

Q. 1963 küm 1st December sülen Nagaland nung arua alirtem nem Nagaland nung dokan amentsü, taxi aser auto rickshaw anishitsü permit magütsü nunga koma süla?

Olong 20 shi nung February 19, 2021 tashi nung iba telangzûba ya onok dangi (e-mail - tiryimyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzûbatemji taruba Honibarnû adoktsûtsû.



New Delhi, February 13, 2021: Honibarnü Lok Sabha Budget senden nung Ato kilonser, Narendra Modi adenba noksa nung angur.

Feb 18 nü aluyimertemi train lenmang mokdanga longkak aittsü

New Delhi, February 13 (Agencies): Aluyimer lenirtemi Panchayats den angatettepa parnok teyari agia ano longkak tesashiba aittsü tebilemba lir; aluyimertemi sorkar dang aluyimba ozüing asem agentsü akhangba den külemi alu nungi züngsentetba chiyungtsü alir ajak dang nungi Minimum Support Price (MSP) angutsü atema takhangba agütsür.

Haryana aser anüolen Uttar Pradesh nung tang tashi nung MahaPanchayats sentong 10 dak tema agiogo; item sentongtem nung yimdaklirtem nem aluyimba ozüingtem angatetdakja liasü. Sorkari aluyimertem dang nungi talisa tsük aser wheat alizüker, aser iba atemaji sorkari aluyimertem nem MSP agütsüba ajanga state kar nung aluyimertem shilem 10-15 shi tajangzük angur, ta lenirtemi metetdaksü.

"Ato kilonser, Modi densema sorkari aluyimertem nem maneni MSP agütsütsü ta nangzükogo, ajisüaka nija business nisungtem dang nungia MSP agitsü atema onoki akhanger, ajisüaka iba atemaji kecha meinyaker. Tang inyakyim kübok aluyimertem shilem ishikati dang tajangzük angur," ta All Indian Kisan Sabha lenir aser taoba mapang Parliament nung züngsem, Hannan Mollah-i metetdaksü. Mollah-isa, tarutsü nung Punjab, Rajasthan, Madhya Pradesh, Maharashtra aser Karnataka densema state aika nunga mahapanchayats sentong aika ayongzüka agitsü, aser item sentong nung yimdaklirtem nem aluyimertem tebilemba angatetdaksütsü, ta metetdaksü.

Taruba hopta yimtsüngtem nung aonung 7:00 ako nungi

milan amer yimdong süa ghonda ka longkak aittsü. Tamalen aluyimertem aser sepaitem tepsetba nüngtem nung February 14 nüa iba sentong agitsü.

February 16 nü linük tesem ajaklen lokti senden ayonga agitsü aser February 18 nü anüngdang 12:00 ako nungi nikongdang 4:00 ako tashi train lenmang mokdanga aluyimertemi longkak aittsü, ta aluyimer lenirtemi metetdaksü.

Tang tashi nung agiba mahapanchayats aika nung nisung 50,000 dak tema denogo aser kar nungbo nisung lakh 1 dak tema denogo. Item senden nung adener yimdaklirtemi, aluyimertemi longkak aitba ya aluyimertem atema dang masü saka iba ya yimtsüngtem rongsenkettsüing dak sendakba onük ka lir ta angatetjemogo, ta lenirtemisa metetdaksü.

Union Budget ajanga India-i tangar dak memetaloktsü: Sitharaman

New Delhi, February 13 (Agencies): Honibarnü Union Finance Minister, Nirmala Sitharaman-i Union Budget 2021-22 pusema jembidang lai, iba budget ajanga linüki tangar dak memetaloki alitsü jenjang tajungba aküimtsü, ta metetdaksü.

Finance minister-isa, coronavirus wara tayongzükbatem ajanga sorkari temelenshi benokba nung tetsükdaksü magütsü; koba ajanga linük nükjidong ataloktsü, ta metetdaksü.

Lok Sabha nung Union

Budget onük nung jembidang lai, sorkari benokba temelenshitem ajanga alima nung rongsenkettsüing tekaratiba aküimba linüktem rongnung India adentsü atema lenmang lapoktsütsü; iba Budget ajanga linüki tangar dak memetaloki peisasa alitsü jenjang tajungba aküimtsü, ta ashi.

Tan ita tetenzüklen Parliament nung Union finance minister-i 2021-22 küm atema sen 34.5 lakh crore Budget benoka liasü.

Rural job guarantee scheme

atema sen tali lemmzüksüba dak sendakba nung lai, 2021-22 küm atema sorkari Mahatma Gandhi National Rural Employment Guarantee (MGNREGA) scheme atema sen taliba lemmzüksütsü, nüngdang süra Budget estimate sen crore 73,000 dang nungia timba lemmzüksütsü, ta metetdaksü.

Opposition aija Sitharaman-i, Ato kilonser, Narendra Modi leniba kübok sorkari capitalist tem atema masü saka sensakertem atema inyaker, ta ashi.

J&K-i mapang tetemsü nung state jenjang angutsü: Amit Shah

New Delhi, February 13 (Agencies): Honibarnü Union Home Minister, Amit Shah-i, Jammu & Kashmir nem mapang tetemsü nung state jenjang agütsütsü, ta metetdaksü.

Lok Sabha nung Jammu and Kashmir Reorganisation (Amendment) Bill 2021 atema jembidang Home Minister Amit Shah-i, "MP aikati, iba bill benokba ajanga union territory (J&K)-i state jenjang mangutsü ta jembio. Iba Bill ya kü leniba nung benok, ni benoker. Ni iba nükjidong rateta shiogo," ta metetdaksü.

"Jammu & Kashmir nem state jenjang magütsütsü, ta kecha nunga shia mali. Nenoki ibaji kechi ajanga rateter? Ni iba House nung ya shiogo aser ano maneni nenshia ashir- Iba Bill ya Jammu & Kashmir state jenjang den sendaktepa mali. Mapang tetemsü nung UT (J&K) nem state jenjang agütsütsü," ta pai metetdaksü.

Taoba Hombarnü Rajya Sabha nung Opposition Lenir, Ghulam Nabi Azad-i, Congress party-i maneni Union Territory of Jammu & Kashmir nem state agüjang ta akhanger, ta metetdakja liasü.

2019 küm August ita tetenzüklen Centre sorkari

taoba mapang state- Jammu & Kashmir nem maongka balaka agüja aliba Arrla 370 agiena liasü. Iba sülen Union Territories ana (Jammu & Kashmir aser Ladakh) kümtsü.

Lok Sabha nung Shah-isa, tesüiba küm 70 nung Opposition-i kechi inyak, ta asüngdang.

"Ni kecha mashishir, ni telangzüba ajak agütsütsü. Ajisüaka küm aika yimsütsütsü atema maongka angurtemi telangzüba meshitsü temsüa lir asü, ta shisadangtsüla," ta pai ashi.

"Arrla 370 agienba mapang nung onoki kechi nangzük, ta onok dang asüngdang. Iba Arrla agienba sülen ita 17 dang aser nenoki iba atemaji telangzüba meshir. Nenoki küm 70 nung inyakba atema telangzüba agütsür asü? Nenoki junga inyak asübo nenoki onok dang kecha masüngdangla," ta paisa ashi.

February 4 nü Rajya Sabha nung Minister of State (MoS) for Home Affairs, G Kishan Reddy-i Jammu and Kashmir Reorganisation (Amendment) Bill, 2021 ya benoka liasü, iba Bill ajanga Jammu and Kashmir Reorganisation (Amendment) Ordinance, 2021 melentsü. Iba Bill ya Hombarnü Rajya nung agizükogo.

Modi-i aluyimba business ajak par medemer ana nem agütsüner: Rahul



Ajmer (Rajasthan), February 13, 2021: Honibarnü Ajmer anasa Rupangadh nung aluyimertem longkak aitba sentong nung Congress lenir Rahul Gandhi, Rajasthan Chief Minister, Ashok Gehlot aser party lenirtem adenba noksa nung angur.

Jaipur, February 13 (Agencies): Honibarnü Congress party lenir, Rahul Gandhi-i, Ato kilonser, Narendra Modi-i aluyimba business ajak par medemer ana nem agütsüner, ta metetdaksü.

Rajasthan kübok Rupangarh nung aluyimertem longkak aitba sentong nung jembidang Rahul-i, linük nung nütsüing shilem 40 bo aluyimba business nung stakeholders lir, ta ashi.

"Iba ya nütsüing shilem 40 indang business lir, iba nungji aluyimertem, small & medium businessmen, shishilembartem aser aayangertem densema lir. Narendra Modi-i iba business ajak ya par medemer ana nem agütsüner. Aluyimba ozüingtem nükjidongji ibai lir," ta pai ashi.

"Narendra Modi-i, pai shimtsü lenla balala agütsür ta

jembir, ajisüaka item lenlaji-ayaba, mapa manguba aser soseta asüba lir," ta pai ashi.

Honibarnü Rahul Gandhi-i Rajasthan nunger korang ka semer tractor ka ania longkak aitba tesemji tonga aru; tractor nungji pa den Chief Minister Ashok Gehlot aser state Congress Tir, Govind Singh Dotsra nata mena liasü.

Taoba mapang Congress Tir, Rahul Gandhi-i tractor trolley anati yangluba sabang ka nung nokdaker jembi aser aluyimertem ali nung aser tractor trolleys nung sabang longbanga mener iba sentong agi.

Kasa sentong nung AICC general secretary, Ajay Maken aser taoba mapang Deputy Chief Minister Sachin Pilot nata liasü.



Chamoli, February 13, 2021: Honibarnü Chamoli district kübok Raina yimdak kümzüka maparen inyakba noksa nung angur. February 7 nü iba district nung rürjep anenzüka alua tzümettsüing lendong nung nisung aika asüba den ano aika samar mangur.

Somalia tir ki anasa bomb pokdaksü



Mogadishu, Somalia nung bomb agi poksar aliba tesem adena sepai ka süiba noksa nung angur. Police temi ashiba agi, tir aliba ki kima checkpoint ka anasa gari ka nung bomb inoka bener arur pokdaksüba lendong nung suicide bomber ka asü aser civilian aika yirua liasü.

Mogadishu, Tsüklai/February 13 (Agencies): Somalia yimtiba Mogadishu nung tir talidak ki kima checkpoint ka anasa gari nung bomb inoka bener arur pokdaksüba lendong ka nung suicide bomber ka asü aser civilian tenet yirua liasü, ta Police sangdong ka ajanga metetdaksüogo.

Police otongdar Sadiq Ali Adan-i ashiba agi, Honibarnü anepdang bomb bena aliba gari anisang yagi tenokdangba agütsür aliba mangai gari anir

aoba sülen police temi gari dak prongbong agi akha tenzük aser kasa mapang nung nüburtem pei taküm kümzüksü atema jenshia liasü. Paisa, iba bomb apokba lendong nung gari terana dak tema poksaogo, ta metetdaksü.

Somalia nung yimden yimsüsürtem national election ka koma agitsü ta atsütepba mapang tang iba lendong atalokogo.

Election February 8 nü agitsü atema lateta lir aser yimden yimsüsürtemi karibo tir

Mohamed Abdullahi Mohamed mapang langrara menden nung menogo, ta ashir. Pa ano küm pezü yimsü asütsü atema merangdar. Election dak sendakba nung maneni Hombarnü sensak asemtsü lateta lir.

Somalia nung Al-Qaida den sendaktepa aliba al-Shabab extremist teloki Linük yimtiba Mogadishu nung mapashia tongtibang temsemtem dak rangloker maka arudar aser election agiba mapang parnoki amaksü ta amokmerenogo.

China, Russia na UNHRC bangzüng nungi atsüngin

Geneva, Tsüklai/February 13 (Agencies): February 1 nü military-i sorkar atsüngba sülen Myanmar nung tensa dak sendakba nung United Nations Human Rights Council (UNHRC) bangzüng ka nungi China aser Russia na Hokolbarnü atsünginogo, ta NHK World sangdong ka ajanga metetdaksü.

Iba bangzüng yagi Counsellor Aung San Suu Kyi aser tir Win Myint na densema pua alirtem chioktsü akhanger.

Hokolbarnü Geneva nung special session ka agiba mapang iba bangzüng ya agizüka liasü.

China, Russia aser tanga

linüktem iba bangzüng nungi atsünginogo aser parnok indang envoy temi parnok atsünginba metetdaksüogo. Myanmar indang ambassador-i iba bangzüng ya agizüksü makok ta ashiba NHK World sangdong ajangsa metetdaksü.

Taoba mapang UN Special Rapporteur Thomas Andrews-i, Myanmar nung sorkar ketdangsürtem aser human rights lenirtem pua ayuba aija liasü.

Pai ashiba agi, sangdong balala aser noksa balala ajanga security force temi longkak aiterem dak injang khaloktsüba kuli ngutetogo.

UNHRC bangzüng ajanga

azütokshi nungi pilaa alitsü aser meimchir temeden, fundamental freedom aser rule of law akhümtsübuttsü nenshir.

February 1, Myanmar military-i, sorkar amokbanga democracy inyakyim dak ajemdaker shimba National League for Democracy (NLD) sorkar atsüngtok. Parnoki ashiba agi, 2020 küm Novmber ita election agiba nung ochi mashi inyakyim densema lir, koba NLD-i kokogo.

Kasa mapang nung Nepal, Hong Kong aser tanga linüktem nung Myanmar nung tensa mejungi kümdaksüba atema China anem longkak aitogo.

China-i WHO Team nem Raw Data agütsütsü memulung

Shanghai, Tsüklai/February 13 (Agencies): : COVID-19 wara poktetba indang tera jangjatsü atema bushitsüngdangba World Health Organization team nem China-i COVID-19 tashidak mezüng potetertem indang raw data agütsütsü memulung, ta bushitsüngdangertem rongnung kati ashi. Iba ajanga wara poktetba kuli tejangja ngutettsü aliba nungi nokdangtsü akok.

Bushitsüngdangertemi, 2019 küm December ita Wuhan yimti nung tashidak tenzükba mapang nisung 174 dak tashidak potetba indang raw patient data aser tanga case tem indang data meshi, saka parnok nem summary ka dang agütsü, ta WHO team nung Australia nung infectious diseases expert Dominic Dwyer-i ashi.

Iba amala raw data dang ya "line listings" ta ajar aser yimya agi nisung ka maitsü magütsür, ajisüaka shiranger dang tasüngdangba aser parnok telangzüba aser telangzübatem koma asadang iba indang osang tejangja keta lir, ta pai ashi.

"Iba ya wara poktetba bushitsüngdang nung inyakyim ka lir," ta pai Honibarnü Reuters dang Sydney nungi video call ka ajanga ashi.

Pai ashiba agi, raw data asadangtsüji kanga tongtibang, aser talisa nisung 174 rongnung Huanan shishilembadak semdang tesadang dang liasü. Wuhan nung iba shishilembadak mezüng tashidak poteta liasü aser tang tashi shibanger lir.

"Iba yongji onoki maneni

asüngdanga liasü. Kechiba magütsü iba indang ni kecha meshitettsü. Yimden yimsüsüba sendak lir asü mapa mesera agütsütsü tasak aji mejangja.. Tanga kuli kar aliba ajanga data magütsür, aji ni mejangja," ta pai ashi.

China nung ketdangsertemi material agika agütsüogo ajisüaka pai, raw patient data dak sendakba ken o ya team indang tatembangbuba report nung agütsütsü, ta ashi. "Taoba küm anguba dang nungibo WHO team nem data kanga agi timba agütsüogo. Anungji iba kisingjia terenlok ka lir," ta pai ashi.

Bushitsüngdangertemi ngutetba taruba hopta tashi nungi sangdongtsü imlar, ta WHO-i Hokolbarnü ashi.

Maparen benoka inyaksü menomeyangba aser Beijing o Washington na tsüngda ken o atsütepba ajanga WHO nungi bushitsüngdangertem nem timtem agütsür. China-i tashidak mezüng poktetba indang meimshir ta shia Washington-i China aitsü aser iba den bushitsüngdangertemi China semdanga bushitsüngdangtsü atema inyakyimtem lateta toktsüba dena aitsüogo.

Bushitsüngdangertem China-i January ita ao aser hopta pezü COVID-19 wara poktetba asadanga liasü. Parnok China-i anepalutsür aliba tesem aser nisungtem dang semdang aser nüburtem den sensak asemtsü atema temelaba magütsü, kechiyong health dak sendakba nung tenokdangba balala agütsür lir.



Mandalay, Myanmar nung longkak aitba mapang riot police tem den nisung ka asatepba noksa nung angur. Myanmar kübok yimti tulutiba ana; Yangon aser Mandalay nung tang agi hopta anabuba military-i sorkar atsüngba anema longkak aita arudar.

Oxford University-i tanurtem dak Covid-19 vaccine tendangtsü

London, Tsüklai/February 13 (Agencies): AstraZeneca Plc den sentepa yangluba Covid-19 vaccine ajanga tanurtem dak koda kongshir aser iba vaccine agütsütsü kümzüka ali mali, iba indang asadangtsü atema University of Oxford bushitsüngdang ka tenzükogo, ta University sangdong ka ajanga Honibarnü metetdaksü.

Mid-stage trial tasenba ajanga tanur arishi küm 6 nungi 17 tsüngda alirtem atema vaccine ta tapet asü masü aji jangjatsü, ta

university-i mail asüba sangdong ka nung shia lir.

Mezüngbuba volunteer 300 shi züngoksemtsü aser parnok nem iba ita mezüngbuba vaccine agütsütsü imlar, ta Oxford-i ashi.

Oxford/AstraZeneca vaccine ya 'vaccine for the world' ta ajar kechiyong vaccine tem rongnung iba ya dalangba aser lemshitsü atema temelaba lir.

AstraZeneca-i taküm vaccine dose billion 3 yanglutsü aser April ita nungi tenzüka ita shia dose million 200 yanglutsü nükjidong lir.



Venezuela nung Ernesto Quintero anir aoba anema Madrid, Spain nung nüburtem longkak aitba noksa nung angur. Arishi küm 40 tain Ernesto Quintero anir aoba atema Spain nung aliba Venezuela nungertem aser opposition telok kari Hokolbarnü longkak aita liasü. Spain National Court-i, financial broker shiba Venezuela nung ochi mashi ken o nung aija lir, pa Venezuela-i yoktsü obendang agütsü.

India nung Infinix Smart 5 sayaogo



New Delhi, Tsüklai/February 13, 2021 (Agencies): India shishilembadak Infinix Smart 5 smartphone sayaogo. Iba smartphone ya Hong-Kong nung amenoka aliba smartphone company indang budget smartphone tasen alitsü.

Mezüngbo, Infinix indang budget device ya 2020 küm August ita teshimtet market kar nung sayaa liasü, saka India variant ya tanga shishilembadak anguba dang nungi balaka alitsü. Infinix Smart 5 nung dual rear cameras, 6,000mAh battery aser MediaTek Helio G25 chipset inokja lir. Iba smartphone ya Infinix Smart 4 den tatongtep alitsü, koba company-i taoba küm Smart 4 sayaogo.


India nung Infinix Smart 5 - 2GB RAM + 32GB storage variant jenjang sen 7,199 alitsü. Iba smartphone ya Aegean Blue, Morandi Green, Obsidian Black aser 6-degree Purple colour option nung Flipkart sabang ajanga angutsü. Iba e-commerce sabang (Flipkart) ajangasa deal talisa Flipkart Axis Bank credit card nung 5 percent cashback, sen 7, 199 tashi exchange offer aser Bank of Baroda Master debit card amshia anaben tashi mezüing alidang 10 percent off agütsütsü. Talirtemi, EMI ajanga iba smartphone alitetsü, koba ita shia sen 647 alitsü.

Specification tsütsü reprangdangra, Infinix Smart 5 nung 6.82-inch HD+ display den

Drop Notch design keta aliba angutsü. Iba smartphone display panel shilem 90.66 screen-to-body ratio, aspect ratio 20:5:9, aser peak brightness - 440 nits alitsü. Infinix Smart 5 nung octa-core MediaTek Helio G25 SoC - 2.0GHz aser 2GB RAM den 32GB storage option angutsü. Iba budget device yagi dual-SIM card support asür aser Android 10 den XOS 7 UI on top ajanga achaayangtsür. Memory ulua aginürtemi, microSD card ka ajanga 256GB tashi atsülanga amshitetsü.

Smartphone tesülen, dual camera setup inoka yanglutsüogo. Iba set-up nung 13-megapixel primary camera aser low-light sensor dena lir. Selfies atema, Infinix Smart 5 nung 8-megapixel camera angutsü. Camera yagi mode talisa auto-scene detection, slo-mo video, bokeh, AI HDR, AI 3D Beauty, AR Animoji aser tanga feature aika support asür. Tanga feature tsütsü reprangdangra, iba smartphone nung 4G VoLTE, Wi-Fi aser Bluetooth v5.0 dena lir. Infinix Smart 5 nung 6,000mAh battery angutsü, koba standby mapang anogo 50 tashi alitsü. Security atema, iba smartphone nung fingerprint sensor aser face unlock feature inoktsüogo.

"Mr and Mrs Smith" series atema Phoebe aser Donald longjemtsü



Los Angeles, Tsüklai/February 13, 2021 (Agencies): 2005 küm takok tulu anguba movie "Mr and Mrs Smith" nung ajemdaker yanglutsü aliba series ka atema Amazon Studios-i "Fleabag" star Phoebe Waller-Bridge aser singer-actor Donald Glover na aniokogo.

"Atlanta" aser "Spider-Man: Homecoming" nung tongti shilem agisang, Glover-i Instagram sabang ajanga iba osang lemsatep aser series tasenba ya 2022 nung sayatsü ta metetdaksü.

Iba project, koba Waller-Bridge aser Glover nati yanglua liasü, tesüiba ita ishika tejakdang nungi tenati meimbanga dang inyak aser Fleabag" star Bridge-i

Amazon den teka amtepogo, ta The Hollywood Reporter ajanga metetdaksü. "Star Wars" spin-off "Solo: A Star Wars Story" nung Donald aser Phoebe nati shilem agiba sülen, iba series nung tena tanaben longjemba angutsü.

Francesca Sloane-i co-creator ama iba show atema inyakogo. Amazon-i Regency den longjemer iba project yanglutsü. "Mr and Mrs Smith" film production tsütsü Regency ajanga nungitogo.

"Otsü purapitetba aser acting tsütsü Donald aser Phoebe na dak sempet tajung aliba akaji jangjaa lir. Iba project nung tena adenba ya onok mangdang ataloker ama alitsü," ta Amazon Studios head Jennifer Salke-i ashi.

"Mr and Mrs Smith" ya

nüngtugu film ka lir aser Donald, Phoebe den Francesca nungeri parnok tasa amshia iba otsü series kati yanglutsü atema onoki mangateter. Kasa mapang, iba project nung par asem aser New Regency den longjemer inyaktsü maongka anguba atema onok pelar," ta lai shisem.

Simon Kinberg-i züluba script nungi Doug Liman-i direct asüba "Mr and Mrs Smith" film nung Hollywood stars Brad Pitt aser Angelina Jolie nati tongti shilem agiogo.

Maneni, series tasenba nung New Regency indang Yariv Milchan aser Michael Schaefer aser Wells Street Films' Jenny Robins nunger executive producer ama inyaktsü terenemba lir.

MULUNGNE N O



ASO:
19-05-1970

ASÜ:
04-02-2021

Onoki meima aliba asür Chubawati (Settsu), akhümlü wadang nungi piladang onok asükhu nung kija kibongtem, lokti tentet balala, kiyonger aser temeimertem shirnokisa nübu, shisatsü, rongsen aser sarasadem agi yariogo, nenok ajak dang kangasa pelaba lemsateper. Tsüngremi nenok ajak moajangma.

Item rongnungi tali pelaba kar: -

1. Doctor & Nurses, Oking Hospital Kohima
2. Ao Baptist Arogo Kohima,
3. P.W.D kiyong Kohima
4. Settsü Senso Telongjem Kohima
5. Longmisa Senso Telongjem Kohima
6. O.K.M
7. Mezhür H.S.S Kohima
8. Sub- Treasury Office Pfutseru.

- Temeim kinungtsü, chirnurtem aser kinungertem

OFFICE OF THE MAREPKONG WARD YIMDEN MOKOKCHUNG, NAGALAND PELABA LEMSATEPER




12th Feb 2021 nü Indian Dental Association Nagaland State Branch Mokokchung Unit ajanga Tepu (Dental) yangluba/melenba angati teyari ajanga nüburtem aika tajangzük agütsüba atema item Doctor/attendants aser tayonger dang Marepkong Ward yimden aser nüburtem ajaki pelaba lemsateper.

Nenok tarutsü wadang nung nübur yariteta aser kümzüka aotsü Marepkong nüburtem sarasadem.

Sd/-
Toshikaba Lkr
Chairman

Sd/-
Imtisungba Jamir
Secretary.

KÜM 80 AJUNGBA TEPELA



**Noksangtemba Kichu (Retd. Head Master)
Khensa, Yimyu Ward, Mkg**

Tambu, tanü 14th February, 2021 anogo nung na arishi küm 80 abensaogo. Ne temetetba shisatsü tila ka dang süaka ne ochi mapa aser nendaka inyakba ajanga Tsüngremer temoatsü agir ta amanger.

Tsüngremi maneni na arishi talang moajang, ya onok sarasadem.

- Temeim kinungtsü aser adianutem

DIMAPUR MOLUNGYIMSEN FELLOWSHIP METETDAKTSÜR

Asüng, February 14, 2021 nü Dimapur Molungyimsen Fellowship Sentep Sentong 2:30 pm nungi asen anükapang Mr & Mrs. Yangertoshi'er (Duncan) kidang alitsü mapang melenshiba metetdaksür.

DABA Sentep Session ana aliba memelenshi tashi asen Fellowship sentong 2:30 pm nung agitsü.

-Lima Tzudir, Secretary, DMF.

MDCA akhüm nung Titans-i 29th MDCA Inter-Club Cricket Tournament ayongtsü sangdongogo



29 buba MDCA Inter-Club Cricket Tournament ayongtsü atema MDCA o Titans Club na tsüngda tenangzüktep ka agir külen telok ana nungi ketdangsürtem külemi tangokba noksa nung angur. Mokokchung, February 13, 2021

Mokokchung, FEB 13 (TYO):

29 buba 'MDCA Inter-Club Cricket tournament 2021' Mokokchung District Cricket Association (MDCA) akhüm kübok Titans Club-i ayongzüksü tanü officially tenangzüktep (MoU) ka Feb 13 nü yangi Same Old Place restaurant nung agiogo.

'MDCA Inter-Club Cricket Tournament' ya T20 yimya nung MDCA-i kümshi ayongzuka akar aser takümji Titans-i iba asayamung ya parnoki ayongtsü maongka meshia asüngdang nung, tatsü-talang ajak asadanger parnok nem iba khuret lemsateptsü lemteta liasü, ta MDCA tir, Imlikumzuk-i osangbener senden ka nung metetdaksü.

Iba tournament nung MDCA-i arishi küm telemsa/tasazük balala atema asayar tajungtem shimteter aser Inter-district tournament akaba mapang District meyonga asayadaksü.

MDCA ya Nagaland Cricket Association nung züngokba Association ka lir aser NCA ya 2019 küm to Board of Control for Cricket in India (BCCI) nung züngokogo, anungji, maparen ajak BCCI tetuyuba nung ajemdaker inyaker, ta MDCA tirisa shisem.

MDCA tenzüker tanü tashi arudang, district nung cricket asaya ajungketba den lanurtem nem maongka balala lapoktsüba maparen jenti inyaka arudaki, aji oda, ano arishi küm tasazük balala atema coaching den ano tanga nungdakba mapa kar inyaksü tebilemba lir, ta MDCA tirisa metetdaksü.

Titans ya MDCA kübok züngsema aliba club tajung ka lir, parnoki küm 4 tashi MDCA Inter-Club Cricket Tournament benogo aser par telok yagi cricket asaya nungtugu kümdaktsütsü aser ajungkettsütsü asoshi kanga meranga inyaker aser parnok iba

asayamung ya junga ayongtsü onoki tamang akar, ta MDCA tirisa ashi. Titan Club den MoU ya taküm 2021 küm asoshi lir aser ibai tetendangba mapang ka asütsü, ta paisa shisem.

29 buba MDCA Inter-Club Cricket tournament-ji tan ita Feb 22, 2021 nungi tenzüksü sentong renema lir aser onoki iba asayamung ya tajungba kümdaktsütsü aser asentenshitsü nükjidong nung MDCA dang iba asayamung ayongtsü asüngdangba ama, parnoki maongka tulu agütsüba asoshi parnok dang pelar, ta Titans Club tir, Imsuwabangi metetdaksü.

Onoki taoba mapang tournament tila karbo ayongogo saka tang ama tournament tulu bo ibai mezügbuba asütsü, anungji, nüburtem nungi tenungitba aser teyaritep kanga nungdaksü, ta Titans tirisa mepishia ashi. Taküm iba asayamung nung takok angur champion aser runner-up den ano nija senpet balala agütsütsü tebilemba lir, ta paisa shisem.

29 buba MDCA Inter-Club Cricket Tournament nung shilem aginür atema Feb 15, 2021 nungi tenzüka Mokokchung Lovely Centre (Police Point) aser Fix & Fixation (Yongpang Market) dokantem nung form angutsü aser form-ji Feb 20, 2021 tashi nungbo meyiptsütsüla. Kari iba asayamung dak sentakba nung osang tejangja metetnura iba number - 9089927155/8787613893 ajanga tayongertem tongtettsü.

Australian Open: Karolina Pliskova tsükogo

Melbourne, Tsüklai/February 13, 2021 (Agencies): Honibarnü, Australian Open tetsür kija round tasembuba asaya nung, Karolina Muchova-i taoba mapang world no.1 Karolina Pliskova tsükdaksü. Tena asayadang Pliskova ain adoka court tezülen la indang racket raksaba atema point ka agienadok. Czech tsür round tasembuba toktepa mapang seed trokbuba Pliskova kanga tezüdanga asaya aser 7-5, 7-5 agi la tamakok ngua, la indang mezüing Grand Slam title teimla samadok.

"Set ana tashi atonga takok anguba atema ni pelar. Küna tsüngda kanga toktepa asayaago," ta arishi küm 24 tain Muchova-i ashi.

Iba asaya nung Pliskova mezüing set tamakok anguba sülen, tejashi nung lai ama aliba racket raksatsü, koba asaya dak mapet yimya sayur (code violation) ama asadangtet.

Lai racket raksatsüba sülen, asayartem tunnel nung teraksa adokdaksü, saka la inyakyim ya asaya ketdangsür kati angu aser chair umpire Alison Hughes dang metetdaksü, koba tanabuba code violation atema Pliskova indang point ka agienadok.

"Ni court telung nung ain adoka mesayu, court tema nungbo ni mulungba inyaksü melar," ta Pliskova-i mepishi.

"Asaya mapang item inyakyim memelar," ta Huges-i langzü.

Ibaji ajanga Pliskova kecha mesüteti aküm aser asaya nung tamakok mangudang, game pungo tashi nung pa tamakok angu aser Muchova serve anaben tashi lai magizüktet.

Melbourne nung lockdown sangdonger mezüing anogo, Rod Laver Arena nung terepranger medeni Muchova aser Karolina na mezüing asaya. Iba asaya mapang nungdakba staff aser asayar dak alaka, terepranger shinga marudaksü.

Arishi küm 28 tain Pliskova, ya tetsür tennis asayar rongnung tajungtiba ama züngshir. 2017 küm July ita lai world no 1 jenjang tongtetba sülen, Grand Slam asayamung ka danga kokdanga mali.

Tang, world no. 6 nung alila, Pliskova-i 2019 Australian Open semi-final asayaago, kong Naomi Osaka-i la tsükdaksü.

Tetsür kija quarter-final tongtettsü atema Hombarnü Muchova-i seed 18buba Elise Mertens den asayatsü.

****Kasa asayamung tebur kija asaya tanga ka nung seed punggobuba Stefanos Tsitsipas-i Sweden nung Mikael Ymer madak 6-4 6-1 6-1 agi takok ngua pezübuba round-i iogo.**

John Cain Arena nung asayar ana tsüngda kanga toktepa asaya tenzüker aser iba mapang rank 95buba Ymer indang serve nung Tsitsipas-i break point ka dang ngutet.

Tanabuba set nung Tsitsipas-i arishi küm 22 tain Ymer indang serve nung point ana aser tasembuba set nung pa indang serve nung point ka denesema break point pezü angu. Kasa mapang, Ymer-i unforced error 36 angu.

2019 küm Melbourne Park semi final nung shilem agisang, Tsitsipas aser Italy nung seed 9buba Matteo Berrettini na asayatsü.

India tetsür team-i Serbia, Russia aser Ukraine den FIFA Friendly asayatsü

New Delhi, Tsüklai/February 13, 2021 (Agencies): Alima ajunga asüngba coronavirus tenokdangba sülen, India Tsür Senior football team-i bendanglen mezüing international football asayamung nung shilem agitsü terenemba lir.

Alanya, Turkey nung India tetsür team-i international friendly asaya asem nung shilem agitsü.

February 17, 2021 nü India tetsür team-i Serbia den asayatsü. Iba sülen February 19 2021 nü Russia aser February 23, 2021 nü Ukraine den asayatsü. Iba friendly football asayamung dak sendakba nung, tesüiba ita ana tejakdang nungi India Senior tetsür team ya Goa nung training agidar.

"Onoke squad nung sempet tajung aketba asayar tajungtem lir. Taruba tetoktepa asayamung balala atema team renemshitsü mechi, friendly asayamung ya tajangshiba ka ama alitsü. Turkey nung iba asayamung ajanga, asayartem sempet tali jangjashitsü," ta Rocky-i ashi.

"Mapang talangka sülen, team atema iba asayamung ya mezüing asütsü akok. Team-i iba asayamung nung shilem agitsü kanga yongyar aser European team den asayatsü maongka anguba ya jangratemtsüka lir. Iba

asayamung temelabo masütsü, saka temulungtetba tulu nung shilem agitsü terenemba lir," ta Rocky-i shisem.

"Asian Cup atema junga renemtsü asoshi European team balala den asayaba ajanga nungittsü. Küm ana tsüngda iba mapatong ya tetsür Team atema kanga tongtibang alitsü," ta lai metetdaksü.

India Tetsür Team asaya telemsa:

February 17: India vs Serbia

February 19: India vs Russia

February 23: India vs Ukraine

SQUAD:

GOALKEEPERS: Maibam Linthoingambi Devi, Sowmiya Narayanasamy.

DEFENDERS: Loitongbam Ashalata Devi, Ngangbam Sweetie Devi, Ritu Rani, Sorokhaibam Ranjana Chanu, Wangkhem Linthoingambi Devi, Kritina Devi Thounaojam.

MIDFIELDERS: Manisha, Sangita Basfore, Sumithra Kamaraj, Pyari Xaxa.

FORWARDS: Anju Tamang, Indumathi Kathiresan, Soumya Guguloth, Dangmei Grace, Karishma Purushottam Shirvoikar, Sandhiya Ranganathan, Heigruijam Daya Devi, Sumati Kumari.

1buba Champions Trophy T-20: BSTC aser Gorkha XI nati kokogo

Dimapur, Tsüklai/February 13, 2021 (TYO): Honibarnü, Local Ground Chumukedima Town nung Nagamese Baptist Fellowship (NBF) Sports Ministry Chumukedima Village ajanga ayongba 1buba Champions Trophy T-20 Cricket asayamung nung BSCT, Gorkha XI aser Dimensions XI nungeri pei pei tata asaya kokogo.

Mezüing asaya nung BSCT-i wicket 8 agi NBF A akok. Toss koka BSCT-i field asütsü shim aser parnoki over 16.3 nung

NBF A telok nem run 77 dang agütsü. BSCT-i ayong ayonga dang over 7 nung iba alizüing tongtet aser parnok wicket 2 out asü. Manjit-i wicket 3 agiba atema pa nem man of the match award agütsü.

Tanabuba asaya nung Gorkha XI-i run 49 agi Seruzha Sporting Club tsükdaksü. Toss koka Gorkha XI-i batting asü aser over 19.3 nung wicket 9 out süa run 113 target yutsü. Iba alizüing metongteti Seruzha Sporting Club pur over 15.5 nung run 63

dang yanglur asayar ajak out süadok. John-i run 9 yanglua aser wicket 3 agiba atema pa nem man of the match award agütsü.

Kasa anogo, tasembuba asaya nung Dimension XI-i Youngstars Club madak run 31 agi takok angu. Toss koka, Dimension XI-i batting shim, kong wicket 8 out süa run 141 target yutsü. Youngstars Club pur over 17.1 nung run 110 dang yanglur asayar ajak out süadok. Theja-i wicket pungo agiba atema pain man of the match award agizük.

Vijay Hazare Trophy: Vidarbha nung asayar ana dak Covid-19 putet

Nagpur, Tsüklai/February 13, 2021(Agencies): Vijay Hazare Trophy asayamung metenzükdang, Hokolbarnü Vidarbha nung asayar ana - batsman ka aser bowler ka dak coronavirus tashidak tejangja putetba ajanga team nung ongdang tulu adokdaksüogo. Ajisüaka, Vidarbha nung tashidak puteter asayar tenüngtem memetetdaksü.

Iba asayamung atema asayar 22 aser standby player asem densema squad sangdongba sülen, Brehostibarnü asayartem quarantine asütsü tetuyuba agütsü aser iba mapang parnok ajak Covid-19 atema tendang. Tia makai Vidarbha squad nung

tashidak putetba ajanga asayar ana tashi tukuogo.

Shubham Dubey, shibai asayar tajung ka liasü, Saurabh Dubey den pa squad nung bendenlok. Indian Premier League 2021 auction atema final list nung Saurabh Dubey dena liasü.

Local Cricket tsütsü Shubham ya asayar tajung ka ama züngshir, saka kuli kar ajanga pa nem maongka magütsü. Tawa tembangba Guzder Lague 'A' Division one-day cricket asayamung nung run timtiba yanglur asayar pungo rongnung Shubham dena lir. Iba asayamung nung, Shubham-i half century asem densema average 78.17 den strike rate

88.99 nung run 469 yangluogo.

Ano külen, tesüsa tembangba Indian Premier League mapang Mumbai Indians nung net bowler ama Saurabh shilem agiogo. Honibar anepdang Vidarbha team Indore-i aotsü aser anogo pungo atema squad ajunga quarantine asütsü. Iba asayamung nung Vidarbha-i Andhra Pradesh den masaya tsüngda team atema practice session tatsüka dang melatsü.

Vijay Hazare Trophy asayamung Elite Group 'B' nung tanga team ji Madhya Pradesh (February 22), Jharkhand (February 24), Punjab (February 26) aser Tamil Nadu (February 28) alitsü.

BILEMDANGANG

"Tangar tebilemba memetet chilu aidang takoksa ajurur."